

num Carracciolumque cum equitibus & militibus Raven-
nam misit. Guidus Ubaldus hostem fugiens cum se Piti-
lianum in Hetruriam contulisset, diesque complures ibi
fuisset, Cæsare Pitilianum bello aggredi velle dictitante,
ut illum interciperet, magno cum periculo per Senarum
& Florentinorum agrum in fines reipublicæ atque ad ur-
bem se recepit: cui a Senatu libra auri dono in sumptum
singulis mensibus constituta. Quoniam autem libido ea in-
ter cives creverat, ut quamplurimi sacerdotia, quæ habe-
re bonis artibus non poterant, Romæ coemerent, qua in
urbe ejus rei consuetudo facultasque ab Alexandro insti-
tuta late palamque invaluerat, Decemviri sanxerunt, si
quis in posterum id faceret, ejus bona fisco inferrentur,
ipse ab urbe atque urbis finibus quandiu viveret exul esset.
Neque multo post Joannes Michael civis Venetus Cardi-
nalis, qui Pauli secundi Pontificis Maximi sororis filius
fuerat, Romæ veneno interiit, quod ei Alexander a præ-
fecto Michaelis epularum dari jussit. Causa interficiendi
hominem fuit aurum atque argentum, quod is habere exi-
stimabatur: quarum omnino rerum inexplebilis Alexandri
animum cupiditas ad omnem iniquitatem incendebat, uti
filio pecuniam exercitibus alendis suppeditaret, quo is Ita-
lorum principum regna occupare celerius posset se jam se-
ne. Minister veneni haud multo post, Julio Pontifice Ma-
ximo, re per indicium enunciata, in vincula conjectus,
quæstione habita sui sceleris pœnas persolvit.

*Jo. Michaelis
Cardinalis mors. IV.
id. april.*

Bajasetes interim induciis cum Sophi Armeniæ rege initis,
cum quo sibi atrox bellum intercedebat, ad bellum Vene-
tum solutior factus, animos, quos dejecerat, sumpsit, de-
que pace cum republica nihil se facturum dixit, nisi Ve-
neti Leucadiam sibi insulam restituerent. Patres de eo per
Admetis ad Andream Gritum literas perque nuncios cer-
tiores facti, ne diutius eo bello contererentur, pacem cum
Bajasete fecerunt, Leucadiamque insulam, cujus oppidum
magna impensa Pisaurus longe firmitus jam communitius-
que fecerat, Bajaseti restituendam curaverunt, Pisau-
ro domum reditione permissa. Ea de pace uti Diis immorta-

*Pax cum
Bajasete.*